

- रेल मंत्री अश्विनी वैष्णव कह्यो—राजस्थान मांय 55 हजार 452 करोड़ रुपया री रेल परियोजनावां माथे काम चाल रह्यो है।
- प्रधानमंत्री नरेन्द्र मोदी रा जन्मदिन 17 सितम्बर ऊं सेवा पखवाड़ो मनायो जावेला।
- प्रदेश मांय “गांव चलो अभियान” रो नाम बदल र “ग्रामीण सेवा शिविर” करी ज्यो—हर ग्राम पंचायत मांय शिविर लगाया जावेला।
- राज्यपाल हरिभाऊ बागडे शहरी सहकारी बैंकां ने आखिरी छोर रा मिनख ताई फायदो पूगावण री सोच सागे काम करण बाबत् कह्यो।

000

रेल मंत्री अश्विनी वैष्णव कह्यो है के राजस्थान सारू रेलवे बजट मांय करीब 14 गुना बढोतरी करीजी है। वे आज जयपुर मांय खबरनवीसां सागे बातचीत कर रह्या हा। श्री वैष्णव कह्यो के राज्य मांय 55 हजार 452 करोड़ रुपया रा खर्च वाळी न्यारी-न्यारी रेल परियोजनावां माथे अर 85 टेशनां ने और बेहतर बणावण रो काम चाल रह्यो है। रेलमंत्री कह्यो के बेगी ई जयपुर अर बीकानेर ऊं दिल्ली बीचे नुवी वंदे भारत गाड़ियां चलायी जावेला। मंत्री बतायो के जैसलमेर—दिल्ली बीचे रात ने चालण वाळी नुवी रेलगाड़ी चलावण रा बारा मांय ई विचार कर्यो जा रह्यो है। श्री वैष्णव कह्यो के जयपुर कने खातीपुरा टेशन माथे मेगा मेट्रो केंद्र बणायो जा रह्यो है, जिण ऊं स्थानीय स्तर माथे नौकरी-धंधा रा नुवा मौका मिलेला।

000

रेल मंत्री आज अमृत भारत स्टेशन योजना रा तैत और बेहतर बणाया जा रह्या जयपुर जंक्शन रो दौरा कीनो। ई दौरान वे न्यारा-न्यारा कामां रो जायजो लीनो। केंद्रीय मंत्री वंदे भारत अनुरक्षण शैड रो ई उद्घाटन कीनो। श्री वैष्णव इण ई योजना रा तैत और चोखो बणाया जा रह्या गांधीनगर, जयपुर टेशन रो ई दौरा कीनो अर वठे चाल रह्या विकास रा कामां रो जायजो लीनो।

वे लघु उद्योग भारती कानी ऊं राख्यी ज्या आइडियाथॉन-2025 रा समापन सत्र मांय ई शामिल व्हा। श्री वैष्णव कह्यो के आत्मनिर्भर अर ‘मेक इन इंडिया’ पहल ऊं देश तेजी ऊं आईटी अर इलेक्ट्रॉनिक विनिर्माण केंद्र रा तौर ऊं सामी आ रह्यो है। केन्द्रीय मंत्री कह्यो के आईटी हलका मांय भारत री प्रगति री चर्चा पूरी दुनिया मांय व्हे रही है। वे बतायो के देश मांय इलेक्ट्रॉनिक विनिर्माण उद्योग साढे 11 लाख करोड़ रुपया ऊं बत्तो व्हे ग्यो है, जिण मांय 25 लाख ऊं बत्ता लोगां ने नौकरी-धंधा रा मौका मिल रह्या है। श्री वैष्णव कह्यो के लघु उद्योग भारती सागे मिल र पांच हजार नौजवानां ने इलेक्ट्रॉनिक सामान बणावण री सिखावण दी जावेला।

वे कह्यो के जयपुर मांय राज्य सरकार री मदद ऊं इन्क्यूबेशन सेंटर विकसित कर्यो जावेला। केन्द्रीय मंत्री मुख्यमंत्री भजनलाल शर्मा सागे वां रा रेहवास माथे मुलाकात कर र न्यारा-न्यारा मुद्दां माथे चर्चा कीनी।

000

प्रधानमंत्री नरेन्द्र मोदी रा जन्मदिन 17 सितम्बर ऊं भारतीय जनता पार्टी री ओर ऊं देश मांय सेवा पखवाड़ो मनायो जावेला। नई दिल्ली मांय पार्टी रा मुख्यालय मांय खबरनवीसां सागे बातचीत करता थकां पार्टी रा आला नेता अर केन्द्रीय मंत्री भूपेंद्र यादव कह्यो के ओ पखवाड़ो राष्ट्रपिता महात्मा गांधी अर पैली वाळा प्रधानमंत्री लाल बहादुर शास्त्री री जयंती दो अक्टूबर, ताई मनायो जावेला। ई दौरान न्यारा-न्यारा मुद्दां माथे आधारित केई कार्यक्रम राख्या जावेला। श्री यादव कह्यो के प्रधानमंत्री मोदी सेवा अर साफ-सफाई सरीखा बुनियादी

मूल्यां ने देश री सियायत मांय आगे बधाया है। वे कह्यो के कुदरत री हिफाजत रा प्रति श्री मोदी री संवेदनशीलता रे कारण ई भारत अब पर्यावरण ने बचावण री दिशा मांय मजबूती ऊं आगे बध रह्यो है। जयपुर मांय ई सेवा पखवाड़ा रा सिलसिला मांय भारतीय जनता पार्टी री ओर ऊं राज्य स्तर री कार्यशाला राखी ज्यी। कार्यशाला मांय पार्टी रा प्रदेश अध्यक्ष मदन राठौड़, मुख्यमंत्री भजनलाल शर्मा, उपमुख्यमंत्री दिया कुमारी अर उपमुख्यमंत्री डॉ. प्रेमचंद बैरवा समेत पार्टी रा न्यारा-न्यारा ओहदादार अर कार्यकर्ता शामिल क्हा।

000

प्रदेश मांय 18 सितम्बर ऊं चलाया जावण वाळा गांव चलो अभियान रो नाम बदल र "ग्रामीण सेवा शिविर" कर दियो ज्यो है। शिक्षा अर पंचायती राज मंत्री मदन दिलावर बतायो के अभियान रा पहला सप्ताह मांय अ शिविर बुधवार ऊं थावर ताई रोजीना 2-2 ग्राम पंचायतां मांय लगाया जावेला। वे बतायो के अभियान हर पंचायत समिति री हर ग्राम पंचायत मांय शिविर लागण ताई चलायो जावेला।

000

केन्द्रीय संस्कृति मंत्री गजेंद्र सिंह शेखावत कह्यो है के "ज्ञान भारतम्" भारत री पांडुलिपि विरासत ने बचावण, वां ने डिजिटल बणावण अर प्रसार सारू समर्पित राष्ट्रीय पहल है। श्री शेखावत आज नई दिल्ली मांय ज्ञान भारतम् अंतर्राष्ट्रीय सम्मेलन रा उद्घाटन सत्र मांय बोल रह्या हा। वे कह्यो के ई मिशन रो मकसद आवती पीढ़ियां सारू भारत री पांडुलिपि विरासत ने बचावणो है। ई अभियान रा तैत 25 क्लस्टर, 20 क्षेत्रीय केंद्र अर दस उत्कृष्टता केंद्र बणाया जावेला। केन्द्रीय मंत्री कह्यो के जिन्दगी ऊं जुड़ी हजारां साल पैली रची ज्यी सगळी शिक्षा आज ई इंसानियत अर आब-ओ-हवा सारू काम री है।

000

सम्मेलन मांय देश-परदेश रा विद्वानां, जाणकारां, संस्थानां अर सांस्कृतिक कार्यकर्तावां समेत एक हजार एक सौ ऊं बत्ता जणा शामिल क्हे रह्या है।

000

राज्यपाल हरिभाऊ बागडे शहरी हलकां मांय काम कर रह्या सहकारी बैंकां ने आखिरी छोर रा लोगां ताई फायदो पूगावण री सोच सागे काम करण बाबत् कह्यो। वे आज जयपुर मांय सहकार भारती अर सहकारिता विभाग री ओर ऊं राखी ज्यो अर्बन को-ऑपरेटिव बैंक रा राष्ट्रीय अधिवेशन मांय बोल रह्या हा। श्री बागडे कह्यो के कॉ-ऑपरेटिव बैंक लाखां लोगां सारू काम-धंधा रो मजबूत जूरियो है। वे कह्यो के सहकारी बैंकां कानी ऊं गरीबां जरूरतमंद लोगां ने मुख्य धारा मांय लावण रा मकसद ऊं काम करण ऊं "सबका साथ सबका विकास" रो सपनो सांचो क्हेला।

000

जीएसटी परिषद हाल ही मांय जनता ने साता देवण री मंशा ऊं जी.एस.टी. री रेट ने युक्तिसंगत बणावण री मंजूरी दीनी है। ऑटोमोबाइल उद्योग मांय ई आं सुधारां ऊं लोगां ने घणी खुशी मिलेला। साढे तीन सौ सीसी ऊं कम बूता रा इंजन वाळा स्कूटर-मोटरसाइकिलां माथे जीएसटी री रेट 28 फीसदी ऊं कम कर र 18 फीसदी कर दीरीजी है।

चार मीटर ताई लम्बी अर इंजन रा 12 सौ सीसी ऊं कम बूता वाळी पेट्रोल अर 15 सौ सीसी ऊं कम री डीजल कारां माथे जीएसटी री रेट 18 फीसदी कर दीरीजी है। ऑटोमोबाइल कारोबार ऊं जुड्या भीलवाड़ा रा लोकेश जैन बतायो के इण ऊं जनता ने सीधो फायदो मिलेला।

000

राज्य खरीफ री साखां री गिरदावरी रा हलका मांय डिजिटल तकनीक अर जनभागीदारी ऊं खास उपलब्धि हासिल कीनी है। हाल ताई राज्य मांय 1 करोड़ 11 लाख ऊं बत्ता खसरां रो डिजिटल क्रॉप सर्वे पूरो कर लियो ज्यो है। इण मांय सब ऊं मोटो योगदान राजकिसान गिरदावरी एप रो है। राजकिसान गिरदावरी एप रे मार्फत एक अगस्त ऊं हाल ताई किसान

खुद 10 लाख ऊं बत्ता खसरां री गिरदावरी कर दीनी है। ओ एप री मदद ऊं करीजी गिरदावरी रो एक रिकॉर्ड है। सीकर, नागौर, चूरू अर डीडवाना-कुचामन जिलां मांय 60 फीसदी ऊं बत्ती गिरदावरी करी जा चुकी है। बाड़मेर, जोधपुर, नागौर, फलोदी अर सवाईमाधोपुर जिलां मांय ई किसान खुद ई गिरदावरी कर रह्या है। आ बधती तादाद अभियान रा ध्येय वाक्य आपका खसरा, आपकी गिरदावरी, आपका अधिकार ने सांचो कर रह्यो है। 15 अक्टूबर तांई चालण वाळा ई अभियान मांय गांवां रा बेरोजगारी भत्तो लेवण वाळा नौजवान, पटवार सहायक, कृषक मित्र, कृषि सखी अर ई-मित्र चलावण वाळा शामिल है। समाचार कक्ष ऊं माधुरी वशिष्ठ

000

सलुम्बर मांय आज-काल गवरी उत्सव री धूम है। राखी रा आगला दिन ऊं सरू व्द्यो लोक संगीत अर नृत्य रो ओ उत्सव 40 दिन तांई चाले है। म्हाणा खबरनवीस बतायो के गांवाई हलकां मांय आदिवासी समुदाय रा लोग ई उत्सव मांय बढ-चढ र शिरकत करे है।

000

मुख्य सचिव सुधांश पंत तीन नुवा आपराधिक कानून असरदार तरीका ऊं लागू करण रा बारा मांय आज जयपुर मांय अहलकारां सागे मीटिंग कीनी। वे अहलकारां ने जनता मांय नुवा कानूनां रा बारा मांय जाग जगावण सारू मोटा पैमाना माथे अभियान चलावण सारू कह्यो। मीटिंग मांय पुलिस महानिदेशक राजीव कुमार शर्मा नुवा कानूनां रा तैत अनुसंधान अर प्रक्रिया री लगातार निगराणी राखण रा हुकम दीना।

000

आकाशवाणी ऊं हर महीना प्रसारित कर्यो जावण वाळो खास कार्यक्रम मन की बात 28 सितम्बर ने प्रसारित कर्यो जावेला। प्रधानमंत्री नरेन्द्र मोदी रा ई कार्यक्रम री आ 126वीं कड़ी व्हेला। ई सारू आप ई मुफ्त नम्बर 1800-11-7800 माथे 26 सितम्बर तांई राय दे सको हो। ई रे अलावा नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

000